

पत्रुसका ज्याक्तुम नलेम सेलाखाजेम

१ गो येशू ख्रीष्टकु डुल्चो नुड थुर्मा सिमोन पत्रुसका, ईकीमा माम्चुनी नुड गुईलाई सेल्पा येशू ख्रीष्टकु चोमिक्सी मान्थिम नुड जोपा खारी बेसीलामका आकीमा होप्पाम हापा थिकाम थोर ल्वापा गानीलाई ओराम सेलाखाजेम ज्याक्तोडा बेड। २ माम्चुनी नुड ईकीमा डाचो येशूलाई गानी आच्छाडाका छेनीमिमका माम्चुनीका गानीलाई दिदाम नुड न-भ्रसी छोम हापा ग्वानीमीनु।

थोरडा छोम बर्तो लक्नी

३ गुमीलाई छेडीमिमलामका माम्चुनीकु लाम्दीडा लाम्दीमु लागि चाहेबिईमिम खोत्ले ल्वा माम्चुनीकु उनी युमका गुईलाई ग्वाक्साड्डामिम बु। उहेमका उनी त्वाकु युम-भवाक्सी नुड जोपा दुम्सीलामका गुईलाई येसाड्डामी। ४ मेलामका छोम डोक्पु नुड हापा थिकाम उनी याचेजेसीमिम गुईलाई ग्वाक्साड्डामिम बु। मेम्मा मेरामलामका गानी माम्चुनी हेप्पाम बुमी मेप्पामडा दुम्नी मा मेजोपा नका बेबेद्वाक्पा सुम्दीसेरडाम मेजोपा बेसिलामका ब्लुम्सिमु चाम्नी। ५ मेम्मिमका ईनी थोरडला ईनी जोपा दुम्सी काप्तो लक्नी, जोपा दुम्सीडला न छेबेसी, ६ ईनी न छेबेसीडला त्वापलाई जोहोमका जुल्सी, मा त्वापलाई जोहोमका जुल्सीडला इम्सीसी, ईनी इम्सीसीडला माम्चुनीकु लाम्दीडा लाम्दीसी, ७ माम्चुनीकु लाम्दीडा लाम्दीसीडला वा-ल्वाकडा न-थोम बेबेसी, वा-ल्वाकडा न-थोम बेबेसीडला रिखाम काप्तो लक्नी। ८ ओर्मिम खोत्ले ल्वा गानीनुड छोम बु माला गानी ईकी डाचो येशू ख्रीष्टकु

दुथाम चनीमिमका हाम ना हामकाम नुड हाम ना हाम मान्थिम मेदुम्नी। ९ लावो कोडनिमनुड ओर्मिम ल्वा मिबु माला ने मेराम मुचुका जोहोमका ल्वामु मेचाप्सु। मेराम मिक्सीका मेल्लापा सो। डादोम ऊ छुलमिमडाम गुलाई छेको-छेको बेम्मा गुका प्ल्वास्तुम बु। १० मेम्मिमका वा-ल्वाकनी, माम्चुनीका गानीलाई येट्नीम नुड छेट्नीम ज्वाक्पा रेम्बोमु छोम सो हन्पा दुम्नी। गानी आरे बोनी माला ईनी थोरडाम हेल्लो वो ताडताहेरथो मेलनी। ११ मेम्मा ईकी डाचो नुड गुईलाई सेल्पा येशू ख्रीष्टकाम हेल्लो लोवो दुम्पाम बाट्पा किब्दी गोनी हुमु गानीलाई छोम हुनाखाना दुम।

माम्चुनीकु सिजेमडा न सोमु

१२ मेम्मिमका ओर्मिम गानी चकिनम बु मा गानीनुड बाट्पा आच्छाडाकाम ल्वाडा गानी छोम थोरलुनीम बुनी लोवो ओर्मिम ल्वा गो गानीलाई हेल्लो लोवो मिम्बेनीनी। १३ ओ सुबुडा आमा मिरोमडा बुडुमिमसम्म गानीलाई मिम्बेन्मु लागि फमु जोपा लुडडोम बु। १४ हेडालोने ईकी डाचो येशू ख्रीष्टका गोलाई रेम्बेट्डीरीमिम बु, गो दालाडा ओराम मिरोम डिन्मुबासी। १५ गो सिडुमिम चडडा वो गानी ओराम ल्वा ईनी नडा हेल्लो लोवो मिम्थामु आ चाप्सी बेड। १६ ईकी डाचो येशू ख्रीष्ट छोम युमनुडमाका योमीमिमकु दुथाम गानीलाई गुकु थोबेतोकोलो बाछेन्दा दुम्साका बनेबेम्मा सोम्दी होप्पाम सोत्तोकोम मेबायावा। लावो उनी डोक्पु दुम्सी गुकु आकी मिक्सीका ल्वात्तोको। १७ गुमीलाई माम्चुनी पापका डोक्पु मिम्मीडी मा उनी युम भ्वाबेट्मडी।

डोक्पु युम-भवाक्सीलामका उनीमा लोलामका येशूलाई ज्वाक्ता, “ओराम गो द्वाक्पुमिम आमा तारापाचो, ओरामडाम गो छोम गेर्सिकपा बुडु।”^{१८} माम्चुनीकु भ्वाडला गुकु गुमीनुड बात्तोकोलो पाह्नीलाम योक्पा मेराम लोलाम आकी त्वाकाडा थोत्तोकोम बाईडा।^{१९} मेम्मिमका गुकु थोत्तोकोम माम्चुनीलाम-जेपामिमकु सिजेमडा छोम आच्छाडा दुस्ताम बु। नेमसोसोम सोरलुड मेओप्थुम नुड नेमसोसो मेदुमथुमसम्म तुकुम्चिमडला भवाक्पा ओल होप्पाम मेराम सिजेमडा न सोक्नी माला गानी जोपा बोनी।^{२०} खोत्लेडाम डादो ओराम ल्वा गानी थेसिथेन्मु बासी: माम्चुनीकु सिजेमडाम माम्चुनीलाम जेसी उहेम वो माम्चुनीलाम-जेपामिम उनी त्वाका ज्वाम्डिम मेएँ।^{२१} हेडालोने माम्चुनीलाममिम जेसी हेल्लो वो मुचुकु नलामका लुक्ताम मेएँ, लावो माम्चुनी-पेलका जेबेटिमडीमा मुचुमिमका माम्चुनीलाम जेम्डिम बाईडा।

लिमा ल्वा सीपामिम मा मेर्मिमकु पुयुलुक्सी

२ लावो इस्राएलीमिम गोडा लिमा ल्वा सीपा मुचुमिम बाम्डिम होडडा गानी गोडा वो माम्चुनीलाम-जेपा लिसिक्पामिम बुमी। मेर्मिमका ताडताहेरथो लक्पा लिमा सीसिमिम मेचहोमका सीमी, मेर्मिकाम लागि थि सोक्साक्पा डोक्पु डाचो ख्रीष्टलाई वो मेरमी मा दालाडा मेर्मिम पुयुलुबेन्ला सोम्सिप्पी।^२ हापा मुचुमिमका मेर्मिमकु क्रोम्लुपा लाम्दी लाम्दीमी मा आच्छाडाकु लाम्दीकु दुथाम मुचुमिमका मेजोपा ज्वामी।^३ रारी बेपा दुम्साका मेर्मिम सीपाका लिमा ल्वा बनेबेसाका गानीलाम खउलुड रमी। मेर्मिमका देन्दे ल्वामी ज्वाक्साका डादोडा मुलु दुस्ताम बु मा मेर्मिम पुयुलुमी ज्वाक्पा ल्वा

बुहोडडा बु।^४ पाह्नीचोमिमका छुल बेम्डीलो वो माम्चुनीका मेडिडमीवा। गुमीका मेर्मिमलाई खादीगोयु घोम्सोम्डी मा निया दुममिमनेमसम्म लागि तुकुम्चिमडा जुल्थाप्पी।^५ माम्चुनीका माकम सुम्दीसेरलाई मेडिडमीवा लावो माम्चुनीकु लाम्दीडा लाममेदीपा सुम्दीसेरडाम मुचुमिमडला होडकोर्मा थोत्टिमडी। मेकोतिलो माम्चुनीकु न होम्साका बुमु मुचुमिमलाई जोपा-सेला थोबेटपा नोआ नुड उमा नेप्डाम येतले मुचुमिमलाई कोडडा गुमीका गेटिमडी।^६ गुमीका सदोम नुड गमोरा शहरलाई देन्दे ग्वाक्साका बुलु वाबेटिमडी मा फोका बनेम्डी। मम्मा माम्चुनीकु लाम्दीडा लाममेदीपा मुचु हे दुम ज्वाक्पा मेराम रेम्बेम्डी।^७ माम्चुनीका उनी न होप्पाम लोतलाई फ्वाक्मडी। दुम्ला होम्साका मेदोपा मुचुमिमकु घ्राम्लुपा बेसी-दोसीडाम गु उ न नोपा बाईडा।^८ गु माम्चुनीकु न होप्पाम मुचु बाईडा, लावो नेम्फु सिन्था गु मे रुचो मुचुमिमनुड बाईडा। गुका ल्वास्तुम थोस्तुम ल्वाका उ गो मेभ्रसावाम बाईडा।^९ आरेसाका उनी लाम्दीडा लाम्दीपा मुचुमिमलाई दुखालामका हेसाका फ्वामु नुड मेजोपा खारी बेपामिमलाई निया दुममिमनेमसम्म हेसाका जुल्थामुमी ज्वाक्पा डाचोका चमी।^{१०} मेजोपा न होडडा बोमु माल्बाल्पा मा माम्चुनीकु सारखामलाई हाम होडडा वो मेलुपा मुचुमिमका ने छोम देन्दे ल्वामी। मेर्मिम मुचु मेडिपा नुड डोक्पु लिसिक्पा दुम्मी मा पाह्नीलाम युमचोमिमलाई वो डक्साका जेमु मँडिमी।^{११} मेर्मिमडाम ने पाह्नीचोमिम हापा सोनुडमा नुड हापा युमनुडमा लोवो डाचोकु डादोडा मेर्मिमलाई डक्साका मुमा मेबेन्मी।^{१२} लावो मेर्मिम मुचुका उनी त्वाकाडा थेसिमेथेट्मीमिम ल्वाकु दुथाम मेजोपा जेमी। मेर्मिम ने मेमिमसाका खारी बेपा मा चुम्मुमीमा सेन्मुमी लागि कोडडा

गम्डिम सोब्दीपोमिम होप्पाम बुमी।
 मेर्मिम मुचु सोब्दीपोमिम होडडा सिमी।
 १३ मेर्मिमका मेजोपा बेम्डिमका मेजोपा
 बेलासोम्सिप्पी। मेर्मिमका नेम्फूडा
 मेजोपा खारी बेसाका गेर्सिमु द्वामी।
 मेर्मिम ने ग्राम्लुपा नुड मेजोपािमिम सो,
 गानीनुड ग्रुला पेपडा गन्मीलो छोम
 पोमी-डुमीमा गेर्सिप्पी। १४ मेर्मिमका
 मेसेमनुड अम्पा नका मेसेमलाई रेप्पी
 मा छुल बोमुका हेल्लो वो उनी गो
 मेतिम्सी। याक्के थोरनुडमा मुचुमिमकु
 मेर्मिमका फाल्साप्पी। मेर्मिमकु न-गो
 रारी बोमु छोम थेट्पा बु। मेर्मिम वार्डतो
 ल्वापामिम सो। १५ मेर्मिमका जोपा
 लाम्दी डिसाका ताडताहेरथो लक्पा
 बालामकु लाम्दी लाम्दीम्डिम बु। मे
 बालाम बोअरकु तारापाचो बाईडा,
 मेजोपा खारी बेसाका खउलुड डुमु
 द्वाक्पा गु बाईडा। १६ लावो गुका छुल
 बुडुमका भुर्ला सोसिड्डाम बाईडा।
 उ गधाका मुचु होप्पामडा जेस्तामा
 माम्चुनीलाम जेपालाई न मान्थिम खारी
 बेसीडाम भोपुडु। १७ लिमा ल्वा सीपा
 ओर्मिम मुचु कु मेपुट्पा कुकु नोमिम
 नुड ब्लोजुका हट्पा सिखाप होप्पाम
 सो। माम्चुनीका मेर्मिमकाम लागि छोम
 तुकुम्चिमका हुपा खोम बनेबेम्डिम बु।
 १८ मेर्मिमका हाम ना हामकाम ल्वाडा
 डोकपु लिम्सिप्पी। मेर्मिमकु क्रोमलुपा
 मेजोपा नका मेजोपा लाम्दीलाम मालो
 स्वामु चोम्पा मुचुमिमलाई ने कोक्साका
 छुलथो वाम्बेन्मी। १९ मेर्मिमका उनी
 त्वापडा त्वापलाई पुयुलुबेट्पा बादुखाम
 नुड छुल गोडा बुमी लावो मुचुमिमलाई
 ने मेरामलामका वाड बेपा याचे जेमी।
 २० मेर्मिमका ईकी डाचो नुड गुईलाई
 सेल्पा येशू ख्रीष्टलाई छेसाका वो
 सुम्दीसेरडोम मेजोपालाम स्वामी। मेम्मा
 आथावो मेरामथोडा दुम्मीमा मेरामकु
 डुल्चो दुम्मी माला डादो बाम्डिमडाम

वो छोम मेजोपा दुम्मी। २१ मेर्मिमका
 आच्छाडाकाम लाम्दी छेसाका नुड
 मेर्मिमलाई ग्वाक्मा माम्चुनीकु दुम्लाडाम
 र्लोम्सिमीमिमडाम ने आच्छाडाकाम मे
 लाम्दीडा मेर्मिमका मेचक्मीवाम माला
 मेर्मिमलाई जोपा दुप्सावा। २२ ओराम
 उखान होम्साका मेर्मिमलाई आच्छाडा
 दुस्ता: * “र्लेबा उ फोडकुथोडा
 र्लोसीमा ल” मा “सोल्मा खोमी
 र्लोसीमा हिलोडाडा लमा पुलुएली बु।”
 †

डाचो येशू योक्पा नेम

३ द्वादीबुड डोप्सोनी, गानीलाई
 ज्याक्तोम ओराम आमा नलेम
 सेलाखाजेम सो। गानी जोपा मिम्नी
 ज्वाक्साका मिम्बेन्मु लागि सो हन्बेन्सामु
 निफीडा सेलाखाजेम गो गानीलाई
 ज्याक्तोम। २ माम्चुनीकु सिजेम जेपा
 उनी मुचुमिमका माके ज्वाम्डिम ल्वा
 नुड ईकी डाचो नुड गुईलाई सेल्पाका
 ईनी थुर्मािमिमलामका बेबेटिनम ल्वा गो
 मिम्बेनीनी। ३ खोत्लेडाम डादो गानी
 ओराम ल्वा थेसिथेन्मुबासी, हुक्पा
 थारी बिलि गानीलाई सेम्ला बेट्पा
 मुचुमिम रोमी, सेम्ला बेसी नुड मेर्मिमकु
 उनी मेजोपा नमिम होम्साका दोमी।
 ४ मेर्मिमका ज्वामी, “येशू आथावो योडु
 ज्वाक्साका याचे जेम्डिम हे दुस्ता?
 सुम्दीसेर प्रड्स्तामा सुम्दीमो आथाम
 ईकी डाउ-खुउ बाम्डिमकु डादोम थारी
 आथाम खोत्ले ल्वा मेडा बुहोम बु।”
 ५ लावो माम्चुनीकु सिजेमलामका पाही
 माकेडा बाईडा मा सुबु ने कुलामका
 फवास्ता मा कुका खिडुम बु ज्वाक्पा
 ल्वा थेसा-थेसाका वो मेर्मिमका
 प्ल्वामी। ६ मेराम कुका होडकोर्मा
 योक्तामा माकेम सुम्दीसेर पुयुलुस्ता।
 ७ मेराम सिजेमकाडा ओम्लाम सुबु
 नुड पाही मुका ख्याबेन्मु लागि जुल्मा

बु। मेर्चिपलाई माम्चुनीकु लाम्दीडा लाम्मेदीपा मुचुमिम पुयुलुमीलोम निया दुममिमनेमसम्म जुल्मा बु। ८ लावो द्वादीबुड डोप्सोनी, ओराम कोले ल्वा गानी मेप्ल्वानी: डाचोकाम लागि कोलेम को-धुमसड थ(१०००) मा को-धुमसड थ कोलेम होप्माडा बु। ९ डाचोका याचे जेम्डिमडा गुमी छुमी ज्वाक्पा याड-याडकु थेसिथेसी होडडा डाचो मेछुमी। सुवो पुयुमेलुमीनु लावो खोत्लेका मेजोपा खारी बोमु डिन्मीनुमा गुमीडा र्लोम्सिमीनु ज्वाक्साका गुमीका गानीलाई इम्साका लम्थामी। १० लावो डाचो योमीमिम मेरामनेम खुचुवा होडडा मेमिम्मा नेम रो। पाही डोक्पु लोलामका येमा दाम, मेगोडा बाट्पा खोत्ले मुका ख्यामी। सुबु नुड सुबुडा बाटपा खोत्ले पुयुलुमी। ११ खोत्ले अरेसाकाडा पुयुलुमी। मेम्मिमका गानी हेप्माम मुचु दुम्मुबासी? गानी सेपा दुम्साका माम्चुनीकु लाम्दीडा लाम्दीमुबासी। १२ माम्चुनी योमीमिमनेम गानी लन्थानी, मा मेराम थारी दालाडा रोबेन्मु माल्नी। मेनेम पाही मुका छोरोप दुम मा मेसिन्डा बाट्पामिम खोत्ले मुसामका पिलीयोमी। १३ लावो गुमीका गुईनुड याचे जेम्डिम होडडा लाले पाही नुड लाले सुबु लडी, मेसिन्डा खोत्ले माम्चुनीकु न होप्माम दुम। १४ मेम्मिमका द्वादीबुड डोप्सोनी, गानी ओर्मिम ल्वाकु दुथाम लथाक्पा

मुचु दुम्निमका उनी मिक्सीलामडा गानी चाप्तो मेचाप्तो छुल मान्थिम नुड मेर्लोट्पा दुम्साका गुमीडा न-भ्रसीक्साका बानी। १५ गानी ओराम मिम्नी, डाचोकु इम्सीका मुचुमिमलाई सेल्सीबेट्पा थारी ग्वाकु। छाम ईकी द्वादीबुड पावलका वो माम्चुनीका गुलाई ग्वाम्डिम नेप्चीका गानीलाई ओरामडा ज्याक्तुम बाईडा। १६ उमा खोत्ले सेलाखाजेमडा गुका ओर्मिम ल्वाडा ज्याक्तुम बु। उमा सेलाखाजेम गोडा याड ल्वा थेसिथेन्मु मेभापा बु। मेसीसिपा नुड याक्के थोरनुडमा मुचुमिमका मेरामलाई माम्चुनीकु याड सिजेम होडडा कोर्थो हेर्मीडिम बु। आरेसाका मेर्मिमका उनी त्वापलाई पुयुलुबेन्मी।

पत्रसकु हुम्डडाम ल्वा

१७ मेम्मिमका द्वादीबुड डोप्सोनी, डादोडा ओराम ल्वा चक्नीम लोवो चडचडया बानी। मेम्साका गानी दुम्ला होम्साका मेदोपा मुचुमिमकु उनी र्लोसीका ताडताहेरथा मेलनीमा ईनी येम्सीखोपलाम मेवाम्नी। १८ लावो ईकीमा डाचो नुड गुईलाई सेल्पा येशू खीष्टकु दिदामडा बर्तो लक्नी मा गुमीलाई छेतो लक्नी। ओम्लो नुड हेल्लो लोवो उनी युम भवानुम बुनू। आमेन।